

墓圖引

世有歷千秋而不朽逾百世而猶新者非時數之適然也有人焉維持保護於其間故雖經浩劫風霜而鍾靈毓秀之神終勃然其不可沒吾族自唐宋以來歷代祖塋具詳譜帙某鄉某里朗若列眉而究之後嗣子孫知其名莫能指其處荒煙蔓草之中有視爲樵牧之場而不惜者無他形勢莫傳稽查無據耳茲當纂修族譜將兆域之確有可憑者各繪一圖付之剞劂並其來山去水一一註明於右非以壯觀瞻也亦欲使稽求往蹟者按圖可索耳惟冀後嗣子孫以邱壟爲重逐年祭掃保守修培

則非獨祖先遺澤世世守之弗替也而此圖此記亦不爲紙上
陳言矣是爲引